



Issittup Imartaata qeqqani malittarisassaqaqngitsumik aalisarnerup pinngitsoortinnissaa pillugu isumaqatigiisummik Kunngearfiup Danmarkip atuutsitsilernissaata Namminersorlutik Oqartussanit akuerineqarnissaa pillugu Inatsisartut aalajangiiffigisassaattut siunnersuut.

(Aalisarnermut, Piniarnermut Nunalerinermullu Naalakkersuisoq)

(Siullermeerneqarnera)

Naalakkersuisut Inatsisartut aalajangiiffigisassaannik saqqummiussipput Issittup Imartaata qeqqani malittarisassaqaqngitsumik aalisarnerup pinngitsoortinnissaa pillugu isumaqatigiisummik Kunngearfiup Danmarkip atuutsitsilernissaata Namminersorlutik Oqartussanit akuerineqaqqullugu.

Kisianni nunarsuarmi kialluunniit ullumikkut nalunngilaa, silap pissusaa allanngoriartortoq kinguneranillu issittumi siku milliartortoq ilaannikkullu issituup ilarujussuani milliartortoq. Tamatuma kingunerisaanik imartap immikkoortortaasa ilaat kikkunnilluunniit tikinneqarsinnaalerput.

Imartaq pillugu isumaqatigiisummi pineqarput immikkoortut tamakku tassani nunarsuarmioqatigiit inatsisaat naapertorlugit ullumikkut kikkulluunniit aalisarsinnaatitaapput. Tassa aalisarsinnaatitaapput killeqaqngitsumik inatsit naapertorlugu. Aalisarneq ullumikkut taamaallaat killilersorneqarpoq pinngortitap nammineq killilersuineranit, ukiup ilarujussuani sikuusarnera pissutaalluni.

Issittup imartaata qeqqani aalisarnermut isumaqatigiisut tunngavigalugu nunat tallimat issittumut killeqarfeqartut imminnut pisussaaffilerput immikkoortumi pisuussutit atornerarnerinut atatillugu ataatsimoorlutik naleqqussaasarnissaminnut aamma aalisarenq pisassasoq ilisimatuussutsikkut paasisat tunngavigalugit. Isumaqatigiisuteqarnikkut naalagaaffiit imminnut pisussaaffilerput aalisakkanik pisuussutinik atuineq illersorneqarsinnaasumik tunngaveqassasoq.

Peqataanik isumaqatigiisutit issittup inoqqaavisa soqutigisaat qularnaassavai ilanngullugit issittup inoqqaavisa aamma najukkami inuusut ilisimasaat ataqqineqassasut aalajangiinernilu inuit pineqartut peqataanineqartassasut.

Demokraatini issittup imartaa pillugu Kalaallit Nunaata ilanngunnissaa ilalerparput, Demokraatini pingaartikkatsigu, nunat issittumut sineriallit tallimat - tamarmik issittumut killeqarfeqartut - suleqatigiinnissaat. Suleqatigiisutigalugu pisuussutinik atuinerup illersorneqarsinnaasumik pinissaa. Suleqatigiinnerup qularnaassavaa akuusut tamarmik tusarniarneqartarnissaat, immikkoortut pillugit aalajangiisoqartinnagu.

Taamatut oqaaseqarluta Demokraatini isumaqatigiisummik Kunngearfiup Danmarkip atuutsitsilernissaata akuerineqarnissaa pillugu Naalakkersuisut siunnersuutaat ilalerparput inassutigalugulu immikkoortoq ataatsimiititaliamut ingerlatinneqassasoq.